

3 John

Hatolu Leta John Mo Ulia

Leta nike

John mo uli leta nike matan vara kalesia la pa ūromiūromi mata tueni la haratu la lo vai na vavahinau non Moli na jara tinatinapua na varama. Mo ulia isan Gaius, tamlohi tavera matea na rasua ale mo lo usuri posposi akerihi moiso.

Hin Leta Nike

1. Retioloolo isan Gaius (1–4)
2. Kalesia la pa hase tuetuenira (5–12)
3. Isoiso retioloolo (13–15)

¹ Leta nike, enau patu tamlohi rasua sei John na ulia isan tapalaku ūruhu ūruhu sei Gaius, na opoiho na retivaraūruhu. ² Tapalaku ūruhu ūruhu, na usiusi vara hinau tari la pa ūruhu isam, na lo ūromtoho vara epem i pa suiha sohen ko suiha na nom mauri rasua. ³ Na rani vorai kalesia la rohi kamam nike, la verea vara engko, ko lo hahau usuri na retivaraūruhu, ale enau na avulahi tavera matana. ⁴ Mo sopo te hinau hatea i vaiau a avulahi tavera sohen harihi hin haratu na rongoa vara natuku la lo hahau usuri na retivaraūruhu. ⁵ Tapalaku ūruhu ūruhu, ko vai na hina tataholo mata rasua matan ko lo tueni na vorai kalesia sei la lo mai isam, hina purongo vara enira la tamlohi tinapua, ⁶ enira la vere na nom opoia isan la vao kalesia nike. Ale mo ūruhu vara o ūlera na nora hahau na posposi mo tataholo na nahon God, ⁷ matan la lo hahau mata hijan Moli, la hatihia

moiso vara la pa sopo lavi te tuetueni isan te tinapua vara mo sopo levosahi God. ⁸ Matana, mo ūhu vara ūa tueni na tamlohi sohen harihi, matan vara ūa eři voko peresira na retivaraūhu. ⁹ Na uliuli mo vano isana vao kalesia atu moiso, pani Diotrephez mo opoia vara enia i pa tiroma hinira, mo ūhu vara i tapurongo hin kamam. ¹⁰ Ale vara a mai, a pa reti isana matan mo lo verelejileji kamam, ale mo sopo haratu purongo mo vaia, pani mo lo turuhoro na voraiřa la lo mai vara la rohi na vorai rasua ea. Ale mo tau nařihi na tamlohi mata vao kalesia matan la opoia vara la sile na retiololo isara. ¹¹ Tapalaku, o sopo tisuri na posposi sasati, pani o tisuri na posposi ūhu matan haratu la lo vai na hina ūhu enira natun God, pani la haratu la lo lejileji tarea la pa sopo levosahi God. ¹² Tamlohi tari la verea vara Demetrius enia tamlohi ūhu matea, ale nona vujangi mo vararūhu matan la vujangia vara enia tamlohi ūhu. Kamam sohena, kama lo verea vara enia tamlohi ūhu matea, ka levosahia vara kama lo verea vararūhu.

Isoiso Retiololo

¹³ Vararūhu na opoia vara a mele vere kamim na hinau matuvana, pani na sopo opoia vara a ulia hin leta nike purongo. ¹⁴ Pani na lo ūmotoho vara a pa mai nohorihī purongo, ale ūa pa sorasora matavuhi. ¹⁵ Na usiusi vara tamata non God i pa toho isam. Tapalam nike, la sohai na nora retiololo isam, ale o pa sile na retiololo isana tapalařa hatehateahi atu.

**Tangoa New Testament
The New Testament in the Tangoa Language of
Vanuatu
Le Nouveau Testament dans la langue Tangoa de
Vanuatu**

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

89356e5c-df58-558e-9b27-ae0321adb2df